

Ilageeqarnikkut qanoq siuarsaasinnaanerluta, oqaluffeqarfinnilu sulisut atugaat qanoq pitsanngorsarsinnaaneri pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasortaq, Aqqalu C. Jerimiassen, Atassut)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Naalakkersuisut sinnerlugit Inatsisartunut Ilaasortaq Aqqalu C. Jerimiassen, Atassut, "Ilageeqarnikkut qanoq siuarsaasinnaanerluta, oqaluffeqarfinnilu sulisut atugaat qanoq pitsanngorsarsinnaaneri pillugu apeqquteqaat aallaavigalugu oqallisissiasatut siunnersuut"-eqarneranut qujaffigaara.

Ataatsimut isigalugu Ilageeqarneq politikikkut suliffeqarfittut eqqarsaataasimangilaq, taamaassananilu. Ilaatigut tamanna tunngavigalugu Inatsisartut 2010-mi Ilageeqarneq pillugu inatsit akuersissutigaat tassuunakkullu politikikkut aqqissuusaanermut tunngatillugu Ilageeqarneq pillugu killiliussaat tunngavilersorlugit, Ilageeqarnerullu nammineq ilusilersornissaani pingaarutaa naqissuserneqarluni. Ilagiit Ilageeqarnermut qitiupput taamaammallu Ilageeqarneq pillugu qanoq iliornissamut tunngatillugu ilagiinni ataasiakkaanni Ilageeqarnerullu iluani oqallittoqartariaqarluni, qanorlu aamma inuiaqatigiinni nutaaliame Ilageeqarneq pilerinarsarneqarsinnaanersoq oqallisigineqartariaqarluni. Oqallinnerit imaattut ilagiinni aamma eqqartorneqartariaqarput, politikeriesugut akornanni taamaallaat eqqartorneqaratik.

Oqallisissiatut siunnersuutimini siunnersuuteqartup pattattut ajoqillu eqqaavai. Naalakkersuisut ilisimavaat, pattattutut ilinniartitaanermi ilinniartussat pileritsassarnissaannut kiisalu ilinniarnep nalaani ilinniagaqaannarnissaannut kingornalu pattattutut atorfinitsinnissaannut ilungersunartoqartoq.

Unammilligassat ilaat Naalakkersuisut nalunaarusiaani "Organistinik amigaateqarneq suullu peqqutaanersut pillugit nalunaarusiaq"-mi nassuiarneqarput. Nalunaarusiaq tunngavigalugu Naalakkersuisut maluginiarpaat, unammilligassat arlallit akissarsiaqarnermut pattattutullu sulinissamut soqutiginninnerup appariartornerannut tunngassuteqartut aammalu Ajoqit pattattullu peqatigiiffiat ukiorpaalunni siulersuisoqarsimangitsut taamaattumillu peqatigiiffittut ingerlalluarsimanatik. Tassunga atatillugu oqaatigineqassaaq, ajoqitut organistillu atorfiit piffissap ilaani atorfiusut, taamaammallu akissarsiat kisiisa inuussutigineqarsinnaanissaat ilimagineqanngilaq. Akissarsiani atorfeqarnermilu atugassarisat suliffeqarnermi illuatungeriit akornanni isumaqatigiinniarnikkut kiffaangissuseqarluni isumaqatigiissuteqartariaatsimik taasartakkatsigut aalajangerneqarput. Organistit ajoqillu akissarsiatik SIK aqutigalugu isumaqatigiinniutigisarpaat. Isumaqatigiissutinik isumaqatigiinniarnernut politikikkut akuliunnissaq Naalakkersuisut kissaatiginnigilaat, tassa suliffeqarnermi illuatungeriit akissarsiamik isumaqatigiinniutigineqartut qanoq atornerarnissaannik namminneq pingaarnersuisarnerat Kalaallit Nunaanni ileqqorigatsigu. Naalakkersuisulli ilinniarnermi pitsanngorsaatissat pillugit organistit ajoqillu peqatigiiffiannik oqaloqatiginnikkusupput. Peqatigitillugu suliassat sulisullu sulisoriinnarnissaannut taakku

sunniuteqartarnerat Biskoppeqarfimmut nunatsinni organistinut ajoqinullu sulisitsisuusumut oqaloqatiginnissutigineqarluarsinnaapput.

Tamatuma saniatigut siunnersuuteqartup oqaluffiit iluarsarnissaannut pisariaqartitsineq eqqaavaa. Naalakkersuisut eqqumaffigaat, sumiiffinni arlalinni oqaluffiit aaqqitassaasut taamaattumillu Ilageeqarneq peqatigalugu ataavartumik aserfallatsaaliuinermik suliaqarlutik. Tamatuma saniatigut oqaluffiit qanoq inneri pillugit nalunaarsuineq aallartisarneqassaaq taamaalilluni aserfallatsaaliuinermut iluarsaassinermullu pisariaqartitsinermut takussutissiaq nutarterneqassalluni. Iluarsaassinermut sanaartormermullu aningaasanut atatillugu qanoq issutsimut nalunaarsuinerit Ilageeqarnerullu nammineq nalunaarsugai kissaatigisaalu Naalakkersuisut pingaarnersiuinerannut tunngaviliisinnaapput.

Kalaallit Nunaanni Ilagiit unammillernartumik inissisimaffii arlallit eqqaariikkattut Naalakkersuisut eqqumaffigaat, ilaatigut aningaasat immikkoortinneqarsimasut suliaassanut Kalaallit Nunaanni Ilagiinnut naammassineqartussatut naatsorsuutigineqartunut naleqqukkunnaarsimasut.

Ilageeqarneq nunap inuisa ilarujussuinut annertuumik pingaaruteqarpoq, tassa nalliuttorsionerni, piffissani ilungersunartuni ulluinnarnilu inuiaqatigiinnut patajaatsumik ikorfartuisuummat. Taamaattorli inuiaqatigiit nutaaliat nassataanik Ilageeqarneq unammilligassaqarpoq. Taamaammat sammisaq oqallisigisassaqqissoq saqqummiunneqarpoq, Naalakkersuisullu inersuarmi oqallittoqarluarnissaanut qilanaarput.